

E Kanser di Kosovo

E storianan di e refugiadonan di Kosovo ta hororoso: ekspul-shon, kimamentu di kas, detenshon di hòmbènan, separashon, maltrato, matansa. Puntra e serbionan pakiku nan ta hasié; talbes nan mes no por kontestá. Segun nos ta komprendé, mayornan di diferente grupo étniko ta indoktriná nan yunan ku e otro grupo a maltratá na antepasadonan síglonan pasá. E violensia di awe ta resultado di amargura ku a keda kushi pa síglonan.

Pa nos, e konflikto na Kosovo ta inkomprensibel. Ma talbes rais di e konflikto na Kosovo ta krese salú na nos islanan. No ta serbionan i albanesnan so ku ta nenga pordoná. Nos tambe a pega ku e kanser di Kosovo riba nos pid'i baranka.

Señoranan besiña no ta papia ku otro pa motibu di algu ku a sosodé añanan anterior. Kisas el a kuminsá ku un kos chikitu: un a lubidá di kumindá, yu a kibra bentana di besiña, un palabra ku a ofendé, èts. Ma el a eskalá i awor e yunan, prohibí di papia ku e muchanan besiña, ta lamta ku un rabia pa ku besiñanan, kisas sin sa dikon...méskos ku Kosovo.

Ma no ta besiña so. Koleganan ta nenga traha ku otro. Dos tineidjer femenino ta enemigu mortal pa motibu di un yònkuman ku tur dos ta gusta. Esposo no ke lubidá ofensa di su esposa. Mayornan siegamente ta tuma parti pa nan yu kontra dosente. Suidadanonan tin agente polisial na kurason pa motibu di sièrtu akshon òf medída. Ningun ke pordoná.

Algun ta hasi kos ridíkulo: krusa kaya, sinta pafó den solo kayente, kambia trabou, pasa di otro ruta, muda, kibra plan di fakansi, keda sin gosa un evento deportivo, èts. djis pa evitá di topa e pèrsona ku nan ta nenga pordoná. Otronan ta hasi redu, kritiká, bòikòt, palabra malu, violensia, èts...manera Kosovo.

Kiku bo ta logra dor di nenga pordoná? Konstant bo ta pensa di esun ku a ofendébo. Inkonsiente bo ta bira su katibu. Bo bida ta lora rònt su skema. Amargura ta yena bo kurason. **Di bèrdat, ta bo mes bo ta pèrhudiká...no e!**

Dios ta eksigí pa hende pordoná. Bo tambe ke esei...sigur ora **abo** t'esun ku a kometé e ofensa. Ma ora **bo** tin ku pordoná, bo tin tur klase di ekskusa. "E ni sikiera a pidi despensa." "Mi'n ta sinti pa pordoná." "E herida ta muchu fresku ainda!" I e ekskusa (mentira) bon konosí: "M'a pordoná, pero mi'n ta lubidá." Dios ta bisa, "Pordoná!" P'E, ningun ekskusa ta válido.

Nos tur konosé e orashon "Nos Tata". Hopi hende ta res'é tur dia, asta vários bes pa dia. Ma maske nos sa e orashon bon, ta klaro ku nos no ta paga tino na e palabranan.

Nos ta pidi Dios "...pordoná nos...méskos ku nos tambe ta pordoná..." (Mateo 6:12). Bo ke esei di bèrdat? Bo ke pa Dios pordonábo **meskos** ku bo ta pordoná otronan? Di bèrdat, nos ta deseá p'E pordoná nos **mas** ku nos ta pordoná otronan, pasobra nos sa ku nos pordon ta laga hopi di deseá.

Hesus a bolbe enfatisá e importansia di pordoná nèt despues di e orashon "Nos Tata." El a bisa, "*Si boso pordoná hende nan transgreshonnan, boso Tata selestial tambe lo pordoná boso. Ma si boso no pordoná hende, boso Tata **tampoko lo no pordoná boso transgreshonnan***" (Mateo 6:14-15).

Un dia nos tur (sin eksepsjon) lo ser ofendé, ignorá, insultá, maltratá, malkomprendé, èts. No por evitá esei; e ta un parti di bida. E pregunta prinsipal ta: **kon bo ta reakshoná?** Bo por hasi méskos ku Kristo, ku soportando e ofensa mas grandi di historia riba krus a bisa, "Tata, pordoná nan."

Pordon ta un desishon. Bo por **skohe** pa pordoná, i gosa e alivio ku esei ta ofresé. Of bo por **skohe** pa nenga pordoná, i reproduzí e kanser di Kosovo den bo mes kurason i kas. Ta bo desishon.